

15. august 2009

UKA 2009 / 112

Inatsisartut suleriaasianni § 36, imm. 2 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqut:

1. **meerartaarnermi sulinnigiffeqartarnek Danmarkimi periuseq naapertorlugu sivilutiginngortinneqarnissaannut periarfissat/aporfissallu nassuiaatiginnaavisigit?**
 2. **angutit arnallu naligiisitaanissaat eqqartortuartillugu, anaanaasup ataataasullu meerartaareernerup kingorna sulinnigiffeqartarnermikkut naligiisitaanissaat suliniutigineqalersaarnerluni?**
 3. **angajoqqaanngortut innarluutilimmik meerartaarsimasut suli sivilunerusumik sulinnigiffeqartarsinnaanerit anguniarlugu Naalakkersuisut suliniuteqarnerlutik, pilersaaruteqarnerlutilluunniit suliniutiginissaannut?**
 4. **Namminersortuni sulisorineqartut meerartaareernerup kingorna sulinnigiffeqarnissamut pisinnaatitaaffii pitsanngorsaaviginiarneqarnerlutik?**
- (Inatsisartunut ilaasortaq Doris Jakobsen, Siumut)

Tunngavilersuut:

Meerartaarnermi sulinnigiffeqartarnermut inatsit ukiuni qanittuni iliuuseqarfigineqarnikuungaluartoq taamaattoq, nunarsuarmioqataanerput nunallu qanitagut suleqatigisagullu ataatsimut anguniagaqartarnerput eqqarsaatigalugit nutarteriuarnissaq nalilersuiuarnissarlu pisariaqarpoq.

Meeraq inunngornerminiit anaanaminit milutsinneqartoq aammalu angajoqqaaminit qanilaarnermik misigitinneqarluarsimasoq timikkut tarnikkullu peqqinnerullunilu toqqissisimanerusartoq ilisimatusarnerit uppernarsarpaat. Taamaammatt kaammattuutigineqartarpoq meeraq sapinngisamik minnerpaamik ukioq ataaseq anaanamini miluttassasoq, timikkut akiuussutissaqarluarniassammat.

Ullumikkut sulinnigiffeqarsinnaatitaaneq makkununga sisamanut immikkoortiterneqarpoq:

1. Naartunermi sulinnigiffeqarneq, tassa anaanaasup erninissami tungaanut sulinnigiffeqarnissamut pisinnaatitaaffia (Ullut 14-t sioqqullugit)
2. Anaanaasup sulinnigiffeqarnera, tassa anaanaasup ernereernermi kingorna sulinnigiffeqarnissamut pisinnaatitaaffia. (Sap. ak. Siullerni 15-ini, amerlappata 19-it)
Tassa imaappoq arnap napparsimanini pissutigalugu meeraq paarisinnaanngippagu anaanaasup sulinnigiffeqarsinnaatitaanera aatsaat ataataasumut kommunit tunniussinnaavaa, imaluunniit anaanaasooq toqkukut qimagukkaluarpat.
3. Ataataasup sulinnigiffeqarnera, tassa ataataasup ernereernerup kingorna sulinnigiffeqarnissamut pisinnaatitaaffia. Ataataasooq meerartaarnerup kingorna sap. ak. Siulliit 15-it / 19-it ingerlaneranni sap. ak. 3-ni sulinnigiffeqarsinnaatitaavoq.

4. Angajoqqaat sulinnigiffeqarnerat, tassa angajoqqaat sulinnigiffeqarnerup naareernerata kingorna meeqqap paarinissaanut sulinnigiffeqarnissamut pisinnaatitaaffiat. Angajoqqaajusut ernereernerup kingorna sap. ak. Siulliit 15-it / 19-it qaangiunnerisigut sap ak. qulit sulinnigiffeqarsinnaatitaapput. Tassani angajoqqaat namminneq aalajangissavaat arlartik sulinnigiffeqassanersoq aammalu nikittaallutik sulinnigiffeqarsinnaanerlutik. Ataatsikkoorlutilli sulinnigiffeqarsinnaanatik. Angajoqqaalli arlaat toqkkut qimaguppat taava aappaasoq sulinnigiffeqarsinnaatitaqqilersinnaavoq.

Qallunaat Nunaanni ullumikkut meerartaarnermi sulinnigiffeqassagaanni sap. ak. 52-it periarfissaavoq, nunatsinni sap. ak. 32-aasut, nunat avannarleqatigut allat eqqarsaatigissagaanni suli sivilunerusumik, taamaammatt oqartariaqarpugut nunatsinni meerartaarnermi sulinnigiffeqartarnikkut kinguussaasimasugut iliuseqartariaqartugullu.